

02/05/1999

Jangan samakan buku kotor dengan firman Allah

SETELAH mengejutkan anggota masyarakat yang berfikiran waras dengan menyifatkan Timbalan Perdana Menteri, Datuk Seri Abdullah Ahmad Badawi sebagai Badwi 'penjaga babi', Datuk Fadzil Mohd Noor mempromosikan kita pula dengan memuji novel celupar Sasterawan Negara (tak payah sebut namanya) sebagai berani.

Presiden Pas itu menyifatkan 'Novel Politik Yang Busuk Lagi Membusukkan' itu sebagai "sumbangan besar kepada rakyat".

Tetapi yang membuatkan kita lebih daripada gempar ialah apabila 'tok guru politik' Pas, Datuk Nik Abdul Aziz Nik Mat, menyamakan kelucahan dan maki-hamun Sasterawan Negara dan ahli seumur hidup Pas itu dengan firman Allah.

Apa sudah jadi? Apakah ilmu yang dipakai oleh anak Banggul Derdap itu sehingga pemimpin-pemimpin Pas melatahkan begitu hebat?

Sebelum latah ini berlarutan dan memburukkan lagi ancaman terhadap akidah umat Islam dan imej orang Melayu, ada beberapa perkara Kiau hendak sampaikan kepada pembela-pembela Sasterawan Negara dan Tokoh Maal Hijrah Universiti Sains Malaysia itu.

Kiau kata, kalau hendak mencarut, menggunakan bahasa kesat dan memaki-hamun orang, mencarut dan maki-hamunlah tetapi janganlah berselindung di sebalik al-Quran.

Kiau kata, kalau hendak gunakan literary licence gunakanlah. Kalau hendak guna kebebasan berkarya gunakanlah. Kalau hendak jatuhkan kerajaan jatuhkanlah. Kalau hendak cerca Dr Mahathir cercalah.

Hanya yang Kiau minta, janganlah remehkan ayat-ayat Allah dan jangan cemarkan kitab agung Islam.

Pertahankanlah novel Sasterawan Negara dan ahli seumur hidup Pas itu dengan sekuat pertahanan, tetapi janganlah bandingkan ia dengan Al-Quran yang agung dan suci.

Sanjungilah Sasterawan Negara dan ahli seumur hidup Pas itu kerana keberanian dan kepintarannya berkarya, tetapi janganlah samakan kelucuhannya dengan sepatah pun firman Allah.

Allah tidak mencarut. Allah tidak maki-hamun. Allah tidak panggil hatta si penderhaka pun 'shit' (tahi, najis) dan 'pu**Mak'.

"Celakalah kamu," bukan maki-hamun tetapi amaran, dan mengancam manusia yang ingkar dengan azab neraka bukanlah mencarut.

Tentunya kemungkaran besar menyamakan tulisan Sasterawan Negara dan ahli seumur hidup Pas dengan ayat-ayat Allah.

Kiau kata, kalau Fadzil hendak jadi Perdana Menteri Malaysia jadilah. Gunakanlah apa juga cara dan hujah untuk menjatuhkan Dr Mahathir.

Tetapi janganlah cemarkan budaya dan tatasusila bangsa Melayu dengan menghalalkan kelucahan dan keceluparan.

Apa guna tutup aurat kalau hati terdedah kepada kekotoran dan dendam. Manusia nampak aurat tetapi tidak nampak hati. Tuhan nampak segala-galanya.

Kiau kata, kalau Nik Aziz hendak pertahan buku najis Sasterawan Negara dan ahli seumur hidup Pas itu pertahankanlah. Tetapi janganlah samakan buku yang kotor lagi mengotorkan itu dengan firman Allah.

Akhir sekali Kiau kata, kalau Nik Aziz sebagai 'tok guru' Pas hendak menjadikan novel tahi itu sebagai kitab baru Pas, gunakanlah.

Permintaan Kiau, janganlah diletakkan novel itu sebelah menyebelah dengan al-Quran.

Kiau kata, kalau novel Sasterawan Negara dan penulis bermusim itu lebih berkesan daripada al-Quran sebagai kitab politik Pas, gunakanlah tetapi serahkanlah al-Quran kepada orang lain.

Kiau bimbang kalau inilah sikap Pas, apalah nasib rakyat negara ini jika Pas berkuasa.

Tidak mustahil Pas mempertahankan segala bentuk kemungkaran, jenayah dan kesalahan jika ianya dilakukan oleh pemimpin dan orang yang disayanginya seperti ia mempertahankan Sasterawan Negara yang menulis novel kotor dan mengotorkan itu.

(END)